

藏經書院版

卍
續藏經

第 27 冊

中國撰述

大小乘釋論部

新文豐出版公司發行

南無本師釋迦牟尼佛



卍續藏經 第七十二冊目錄

新文豐出版公司影印卍續藏經會編印

中國撰述 大小乘釋論部

起信論捷要二卷	明正 遠註	0001
起信論續疏二卷	明通微述疏	0070
起信論直解二卷	明德 清述	0153
起信論疏記會閱卷首一卷	清續 法輯	0217
起信論疏記會閱十卷	清續法會編	0259
起信論裂網疏六卷釋實又難陀譯	明智 旭述	0637
釋摩訶衍論記一卷	唐聖 法鈔	0731
釋摩訶衍論疏六卷欠中卷末	唐法 敏集	0735
釋摩訶衍論贊玄疏五卷	宋法悟勅撰	0829

起信論捷要序

夫三界虛僞唯心所作。離心則無法。離法則無心。是故真如門中。離名字相。離言說相。離心緣相。故世尊涅槃之際。拈花示衆。以顯說法者無法可說。則知無有定法如來可說。又何假廣藉教。乘以成論耶。然方便門中。一事不捨。或放光。雨花。或豎臂。屈指。或揚眉瞬目。或瞿然啓齒。或顯或默。或定或慧。均爲佛事。是文生滅門中。一切語言文字。資生業等。皆順正法。以此觀之。而論不得不造也。論既成。頓漸雙收。譬如大海不讓小流。自非心意識者之所能聞。初學展卷。若對牆壁。欲使尋文得義。義忘言而釋論之註。不得不作也。註既出。各隨已解。互逞高下。從註者不知誰是誰。非離深離淺。但隨言生解。蔓草難除。欲去其繁。飾聖其綱宗。卽波辨水。觸烟識火。而捷要又不得不述也。屬門上人。從開先昧。師得授斯論。一月影不出戶。遂成此解。可謂文義交徹。釋如析薪。所願信根衆生。因斯以明論。因論而了如來根本之義。如借路還家。因指見月。庶不負造論者示教利喜。令佛種不斷。

之意不然。註者受者俱溺。豈非是爲誘佛衆生。
萬曆丙辰春。湘洲居士李騰芳題。

起信論提要自序

余初剃染時輒遊講席窮歷寒暑以研性相宗乘諸師雖不作德雲面孔余終如響人論百步外聆蚊蚋也至戊申冬問法開先師遂針芥相投春秋幾復甲寅夏復拈明心見性之旨謂益師師命余熟讀起信論便達斯意余卽杜門十餘日力究此論忽爾稍見論義如視諸掌然所詮表直令有情朗鑒心性故以一心法開真如生滅二門立真如門顯不變之體以明真妙淨性本非迷悟不屬凡聖立生滅門顯隨緣之用以明入識心源能現凡聖脩證迷悟因果總令一切衆生洞見自性淨妙非相明照心源圓融能現至使不墮空有斷常見也因以所見乃攝管成註茲削副以告同志時有客過余曰昔太原藏師長水塔師盡閱大藏群典潛神數載始成疏記子何越餘日以數千言能釋茲論將非以管窺天而盡測海耶余曰不然諦觀菩薩立意欲令衆生心樂少文而攝多義者故造此論今疏記者刻意盡取性相言教以廣其義雖法無定故略亦可而廣亦可但學者親文浩

蕩不免望洋而退奚能符合造論者之本致也余不敏僅就論文提挈綱領庶使展卷便見指歸雖然受解緣別或有因於廣文而取解者亦不妨遍探長水諸師之疏記則余又何敢以爲是

皆

萬曆甲寅歲佛成道日廬山正遠述於石照山房

大乘起信論捷要卷上

馬鳴菩薩造

真諦三藏譯

婆首那王子譯語

明廬山沙門 正遠 註

乘有五乘曰人乘天乘聲聞乘菩薩乘如來乘此
言大乘者簡非人天聲聞之乘直示如來乘也故
論云解釋如來根本之義使不起人天種子及二
乘種子唯住如來種中正因相應此大乘義總有
二種一者法二者義法即衆生心是心即攝世間
出世間法依於此心顯示摩訶衍義復有三一
者體大二者相大三者用大謂堅窮橫遍無礙圓
融當體受名不對小故如涅槃云不因小空名爲
大空涅槃亦爾不因小相名大涅槃復以此心名
乘者謂從因至果證取體相用故如文云一切諸
佛本所乘故一切菩薩皆乘此法到如來地故此
中能乘是始覺所乘是本覺始本不二名究竟覺
如梁攝論云乘大性故名爲大乘起信者以一切

衆生雖具此大乘之心迷而不覺或信小乘或沉
外道故菩薩開闢大乘心法起衆生大乘正信如
論云有法能起摩訶衍信根是故應說起謂顯發
信謂忍樂謂以大乘一心顯發忍樂名爲起信此
信起時必內由本覺爲因外由師教爲緣因緣和
合內外相資故能顯發如論云因緣具足者能起
厭苦之心信有涅槃起信之義亦有二種一者爲
令善根成熟衆生堪任不退信故二者爲令善根
微少衆生脩習信心故無非令一切頓漸衆生深
信一乘心法而十方佛土中無二亦無三也論者
辨別邪正顯示眞宗故名曰論 問如論云摩訶
衍法即是衆生之心心本是同何有人乘天乘聲
聞乘菩薩乘如來乘之別耶答心本無別障有深
淺如圖覺云發揮無明顯出衆生五性差別由諸
衆生乘此心法能持五戒故名入乘由乘此心脩
行十善兼除欲漏故名天乘由乘此心斷除煩惱
超分段死故名聲聞乘由乘此心以二空智斷斷
二障故名菩薩乘由乘此心斷盡二障永亡二死

故名如來乘。故知在生滅門斷障有五性之別。而眞如門豈立凡聖之異耶。所以祖師門頭見徹於此。不但存餘乘。若見有如來乘者。卽擲之鐵圍山外也。問如論云。發心具有三種。曰信。誠。發。心。解行。發心。證發心。此中獨以起信名題者。何也。答發心最難。在信。信若成就。而三賢解行十聖證位如推門落臼。故世尊說法四十九年。諸大弟子。猶不信。自心是佛。故法華會上放光現瑞。出定揚德。三請三止。傍通曲引。無非使現前三根直信。自心是佛。然三根之衆。旣入信已。世尊隨卽唱滅。則出世之本懷始愜矣。由此而觀。則信心豈容易生乎。所以華嚴云。信爲道源功德母。長養一切諸善根。斷除疑網。出愛河。開示涅槃無上道。歸命盡十方最勝業。徧知色無礙自在。救世大悲者。及彼身體相法性眞如海。無量功德藏。如實脩行等。爲欲令衆生除疑捨邪。執起大乘正信。佛種不斷。故卽宗前敬序分前八句歸敬之詞。後四句敘造論之意。歸敬三寶。略有六義。一荷恩德。二請加護。三

令生信。四爲式儀。五表尊勝。六顯益物。歸命盡十方一句。貫下法寶僧寶最勝業等三句。歸命佛寶也。法性眞如海二句。歸命法寶也。如實脩行等一句。歸命僧寶也。其中及彼身體相。眞攝佛法僧三義。以顯同體三寶也。歸者是依投趨向。義命者。據御諸根之要人之所護。莫此爲先。舉此無二之命。以奉無上之尊。十方者。顯所歸敬之廣。非拘分量耳。最勝業者。卽智淨相及不思議業相也。過小曰勝。超因曰最。以此最勝業用。盡盡識心圓成四智。故名徧知。卽心自在。以正徧知了法。卽如則大小無礙。諸根互用。故云色無礙自在。卽法自在。然色旣自在。卽理如心。旣自在。卽智如理智。一如心色不二。卽證根本智。卽名自覺已圓。復起後得之智。與同體之悲普救世苦。廣攝有情。故名救世大悲者。卽能覺他之意。所謂自覺已圓。能覺他者。故名曰佛。雖能自覺覺他。皆屬智用。故卽從用歸至於體。故曰及彼身體相。旣名以智攝歸于體。而又名及彼身者。以顯智性卽色故也。且證根本智卽是

證自受用身復起後得之智卽是現三類化身耳
故云及彼身也然據論文卽分三身最勝業等二
句卽報身也如文云智性卽色故隨心能示十方
世界無量菩薩無量報身各各差別皆無分齊而
不相妨卽如舊註以徧知爲意業清淨意卽七識
也既云清淨卽轉爲平等性智然平等性智所現
之身亦報身也固知以徧知色無礙名報身矣救
世大悲者卽化身也如文云諸佛如來本在因地
發大慈悲立大誓願盡欲度脫等衆生界亦不限
劫數盡於未來以對凡夫二乘心所見者名爲應
身固知以救世大悲名化身也及彼身體相卽法
身也乃從報化二身歸至法身及彼身者卽上二
身體相二字卽法身也以報化一身不離法身故
何以知體相名法身如文云復次眞如自體相者
從本以來自性滿足一切功德等名爲如來藏亦
名如來法身固知以體相名法身也法身無相而
又以相名法身者以此法身是色體故也如文云
以色性卽智故色體無形說名智身以智性卽色

故說名法身徧一切處法性眞如海二句法寶也
亦從體相而名法寶以依體故名法性眞如海以
依相故名無量功德藏如文云一者體大謂一切
法眞如平等不增減故二者相大謂如來藏具足
無量性功德故此眞如在有情數中名爲佛性在
非情數中名爲法性已上佛寶卽佛性也此法寶
卽法性也故稱法性眞如海眞如具隨緣不變不
變隨緣二義故喻如海以海隨風生浪而水性不
失故也且眞如體中雖一法不立不妨具足無量
稱性功德能攝能持故名爲藏如實修行等僧寶
也如實者卽信自心體相內熏而脩及依諸佛所
說之法而行此指法身菩薩眞實而脩者簡非人
天小乘諸權位菩薩也已上歸敬三寶竟此下爲
欲令衆生等四句正叙造論之意初二句舉所爲
機以令離過次二句明所得益堪任佛果然衆生
根性雖多不出疑而不信者或信而墮邪網者故
菩薩開示大乘心法多設對治方便使除疑生信
捨邪從正發起大乘信根安住如來種中庶使慧

命相續永無斷絕問歸敬者何意先報化而後法身也答法身無相難以投敬故先歸有相之身而攝歸無相之體且三賢位但見報化二身微觀法身卽十地雖漸證法身猶未究竟唯見報身色相莊嚴故知攝用歸體窮相卽性故先歸敬報化而後及法身也

論曰有法能起摩訶衍信根是故應說說有五云何爲五一者因緣分二者立義分三者解釋分四者脩行信心分五者勸脩利益分

此標一論之大旨也有法二字指論所攝一百部大乘之教及本論所詮立義解釋脩行信心三分此大乘之教及本論三分所詮顯者卽衆生眞如自性也衆生雖具此心久迷不返菩薩欲令衆生圖證此心故以一心法開眞如生滅二門使衆生於眞如性中捨生滅因緣起大乘正信能堪能任直入如來之地以是之故應說此論說有次序故列五分一者因緣分卽如餘經中序分也二者立義分三者解釋分四者脩行信心分卽如餘經中

正宗分也五者勸脩利益分卽如餘經中流通分也然此五分旨義下文詳釋茲不繁註

初說因緣分問曰有何因緣而造此論答曰是因緣有八種

此正釋一者因緣分乃本論發起之由也前頌爲欲令衆生除疑捨邪執起大乘正信佛種不斷故未曾指出爲何等衆生以何等法斷除疑網以何觀門對治邪執解釋何義以起正信云何相續令佛種不斷故此假設問意答出八種因緣詳明前旨八種之義下文自釋

云何爲八一者因緣總相所謂爲令衆生離一切苦得究竟樂非求世間名利恭敬故二者爲欲解釋如來根本之義令諸衆生正解不謬故三者爲令善根成熟衆生於摩訶衍法堪任不退信故四者爲令善根微少衆生脩習信心故五者爲示方便消惡業障善護其心遠離癡慢出邪網故六者爲示脩習止觀對治凡夫二乘心過故七者爲示專念方便生于佛前必定不退信心故八者爲示利益勸脩行故有如

是等因緣所以造論

總相者總出造論爲衆生之意一切苦者不過由二障苦因能招二死苦果因煩惱障續分段生死感業繫苦相因所知障續變易生死與微苦相應究竟樂者亦有二義一者無上菩提覺法樂二者無上涅槃寂滅樂衆生由煩惱障故不得無上涅槃寂滅之樂由所知障故不得無上菩提覺法之樂菩薩愍此衆生廣攝教乘開示方便使衆生離煩惱所知之苦得涅槃菩提之樂雖普利有情得究竟樂自亦不居度生之相故云不取世間名利恭敬故然令衆生離苦得樂必欲解釋如來根本之義如來根本卽眞如自性也今欲釋明爲令衆生深信自性眞如直入如來果覺至使不墮二乘外道故云令諸衆生正解不謬故此欲釋如來根本之義正爲立義解釋二分之緣起也三者爲令善根成熟衆生堪任不退四者爲令善根微少衆生修習信心總承上令諸衆生正解不謬之意善根成熟者已經一萬劫十信滿足進入十住正定

題中使前信心堪任不退善根微少者未經一萬劫正信未圓令進修習以滿十信故云修習信心此二種義正爲分別發趣道相之緣起也五者下總爲善根微少修習信心而設也善根微少者總因夙習障重深染邪見故先以方便禮拜懺悔消惡業障由障輕故善護其心內離癡慢外出邪網次示止義以除凡夫著有之過示觀義以對二乘耽空之過既超凡小外道始成正信恐有性不現前見佛難習止觀復示念佛法門令此衆生隨願往生以至不退信心也此三種義正爲修習信心分之緣起也八者示利益勸修正爲勸修利益分之緣起也如彼文中廣舉損益勸令修捨總爲策成脩前諸行也

問曰脩多羅中具有此法何須重說答曰脩多羅中雖有此法以衆生根行不等受解緣別所謂如來在世衆生利根能說之人色心業勝圓音一演異類等解則不須論若如來滅後或有衆生能以自力廣聞而取解者或有衆生亦以自力少聞而多解者或有

衆生無自心力因於廣論而得解者自有衆生復以廣論文多爲煩心樂總持少文而攝多義能取解者如是此論爲欲總攝如來廣大深法無邊義故應說此論

設此一問正顯爲令衆生離苦得樂非求世間名利恭敬故此問答中如文可解但答辭中文分三意從脩多羅雖有此法下略答要造論之意所謂如來在世下明不須造論以能被之人色心業勝所被之機利根深解然色心業勝圓音一演卽三輪也色卽色相輪心卽作意輪圓音卽音聲輪也若如來滅後下正釋前衆生根行不等受解緣別所以要造論也造論之意雖廣攝衆生約機教相扣受化益弘重在心要少文而攝多義者故云總攝如來廣大深法無邊義故應造此論

已說因緣分次說立義分摩訶衍者總說有二種云何爲二者法二者義

因緣已說則序分竟矣今說立義正明正宗之旨立義者卽立因緣分中如來根本之義根本之義

卽名摩訶衍此摩訶衍有無量義今就心要少文而攝多義者總攝無量之義說有二種所謂一者法二者義法義之旨下文自釋

所言法者謂衆生心是心則攝一切世間出世間法依於此心顯示摩訶衍義何以故是心眞如相卽示摩訶衍體故是心生滅因緣相能示摩訶衍自體相用故

法卽衆生心者以顯卽法卽心也故自釋曰是心則攝一切世間出世間法世間卽六凡依正之法出世間卽四聖智理之法誠謂一切因果世界微塵因心成體也以此妙心體相無礙染淨同依隨流返流惟轉此心是故若隨染成於不覺則攝世間之法若隨返流之始覺及不變之本覺則攝出世間之法雖明此心攝盡世出世法猶借生滅門顯未極一心之妙故下卽示三大之義以盡其蘊以顯卽心之體眞妙淨性了無一法但相用中則攝一切法耳依於此心者以明心外無義也此心具空與不空不變隨緣之義若約眞空不變之體

凡聖不立因果雙泯故曰是心眞如相卽示摩訶
衍體故如楞嚴云本覺明心先非水火若約不空
隨緣之用凡聖皆現因果互存故曰是心生滅因
緣相能示摩訶衍自體相用故如楞嚴云汝以空
明則有空現若俱發明則有俱現然眞如相是不
起門不起不因起門而立故獨言體生滅因緣是
起動門不離不起門而起動起含不起故名自體
相用

所言義者則有三種云何爲三一者體大謂一切法
眞如平等不增減故二者相大謂如來藏具足無量
性功德故三者用大能生一切世間出世間善因果
故一切諸佛本所乘故一切菩薩皆乘此法到如來
地故

上雖顯示自體相用此正釋其義也一者體大以
此心體能爲凡聖之依雖一法不立非落斷空乃
如是空義以一切法無有可遣悉皆眞故亦無可
立皆同如故故云一切法卽是眞如既諸法卽如
心色不二能所雙消故云平等不增減故二者相

◆蓋與實同
下舉之

大顯此心相能現凡聖染淨之法雖萬法皆現不
落於有乃如寔不空之義以一切功德依心而住
故云如來藏全體卽心故名性功德三者用大顯
此心用能成凡聖因果之法稱此用大現報化二
身成熟有情善根故云能生一切世間出世間善
因果故世間善卽人天小乘因果法也出世間善
卽三賢行解十聖智理并如來後得智之善也不
善之法雖不離心以遠眞故非其用也已上法義
皆名心性之大此下正顯乘義乘者具從因至果
從果向因二義謂果人已乘眞如體相而證法身
復乘眞如之用現報化二身廣利有情故云一切
諸佛本所乘故因人亦乘眞如體相爲內因薰習
漸證法身復乘眞如之用爲外緣脩持以覺有情
故云一切菩薩皆乘此法到如來地故

已說立義分次說解釋分解釋有三種云何爲三一
者顯示正義二者對治邪執三者分別發趣道相
上立義分中總標如來根本之義此正解釋也一
切衆生不能得成無上菩提乃至別成小乘外道

者皆由真妄不分妄執難除所以錯亂脩習不成聖果故此解釋三種正路令脩行者先明正義以辨真如生滅二門次治邪執以除我法二見至於分別發心之始趨向之終以明位次發心脩進依此三義庶使不遭歧徑直入如來果海也

顯示正義者依一心法有二種門云何爲二一者心真如門二者心生滅門是二種門皆各總攝一切法此義云何以是二門不相離故

依一心法具真如生滅二門者正釋前是心則攝一切世間出世間法依於此心顯示摩訶衍義心真如門者卽解是心真如相卽示摩訶衍體故心生滅門者卽釋是心生滅因緣相能示摩訶衍自體相用故真如生滅皆言門者以一心上具通攝出入二義通攝義者以真無別體卽妄之體而名真故云幻妄稱相其性真爲妙覺明體妄無別用全智之用而名妄故云妙覺明心既稱爲妄云何有因出入義者衆生迷時出真如門入生滅門故云背覺合塵悟時出生滅門入真如門故云滅塵

合覺此二門皆各攝一切法者以其二門不相離故以真如門是染淨通相通相之外無別染淨故得總攝一切諸法生滅門者別顯染淨染淨之法無所不該故亦總攝一切諸法一切法者卽十八界法也此十八界法在真如門攝一相一味俱名真空以根性應性周徧法界故在生門攝名三細六塵在滅門攝名智淨相及不思議相雖有染淨之別總不出依一心而立如楞嚴云殊不能知生滅去來本如來藏常住妙明不動周圓妙真如性則知二門不相離故各攝一切法明矣

心真如者卽是一法界大總相法門體所謂心性不生不滅一切諸法唯依妄念而有差別若離心念則無一切境界之相是故一切法從本已來離言說相離名字相離心緣相畢竟平等無有變異不可破壞唯是一心故名真如以一切言說假名無意但隨妄念不可得故

此正釋真如門也以真如性中心色互融空有平等故謂一法界理事圓攝染淨通依故謂大總相

法門體據中邊論云法界者聖法因義故也謂依
生聖法故云法界大總相者謂總一切法持無量
義也法門者聖智通遊之謂也體者以爲一切法
之依也總謂眞如自性爲淨法之因諸聖共止之
域也如圖覺云有大陀羅尼門名爲圖覺流出
一切清淨眞如菩提涅槃及波羅蜜教授菩薩所謂
心性不生不滅者復釋一法界大總相之意若有
生滅則有住異之別寧得爲一爲大由心性本淨
隨妄不生約治不滅世間不破出世間不盡故謂
一法界大總相也謂一切諸法下返顯心性本無
生滅以一切法唯依妄念而有差別固知眞性無
生唯妄而現若離妄念則法自如所謂諸法本閒
而人自關若離病眼空不生花是故下結顯心性
本淨離諸名相也然名字言說相卽上一切法也
心緣相卽上唯依妄念也以一切法唯依妄念而
有差別眞如性中了不可得是故皆離既離名字
言說差別之相故云平等離心緣生滅之相故云
無有變易破壞三相既離差別亦遺純一眞精如

寔覺性故云唯是一心故名眞如前文所謂一法
界大總相法門體心性不生不滅於此見矣以一
切言說下釋明離此三相之意以言說名字皆無
是體但隨妄念心緣而立妄亦無體了不可得所
以眞如體中悉皆離故

言眞如者亦無有相謂言說之極因言遣言此眞如
體無有可遣以一切法悉皆眞故亦無可立以一切
法皆同如故當知一切法不可說不可念故名爲眞
如

因上言離名字言說等相以顯眞如無相至此復
釋云言眞如者亦無有相以言妄顯眞似有眞如
名言若離於妄眞亦不存雖言說之極因言遣言
故眞如之名言亦遣而眞如之體卓然獨存故云
此眞如體無有可遣以一切法悉皆眞故法既卽
眞故無可遣也雖一切法皆不可遣亦無一法以
當情量故曰亦無可立以一切法皆同如故法既
本如故無可立也然不可遣不落于斷亦不可立
不墮於常斷常既離始名眞如當知一切法下總

結成上義也。意謂真如無相名言俱遣。諸法本如了無情量。欲令學大乘者通達斯義。故曰。當知一切法不可說。不可念。故名爲真。如不可說者。卽令離名字言說之相。不可念者。卽令離心緣相也。問曰。若如是義者。諸衆生等云何隨順而能得入。答曰。若知一切法雖說無有能說。可說雖念亦無能念。可念是名隨順。若離於念名爲得入。

已上釋明如來根本之義。此一問答正令衆生正解不謬。故若如是義者。指上真如心性。離言說等相。乃至一切法不可說。不可念。故名爲真。如意謂如此之義云何而能隨順得入。隨順者方便觀也得入者正觀也。真如既離言說。心念當以離言說處會絕妄念。處入故曰。雖說無有能說。可說雖念亦無能念。可念是名隨順。既無能所言說。則隨真如一切法不可說。故既無能所念。相則順真如一切法不可念。故雖不住能說。所說能念所念。猶是方便觀智。心念未空。但名隨順。必以正觀當前。念相自離。始能得入真如性中。故云若離於念名爲

得入。離念得入之旨。盡在下文覺義中顯。問此明真如自性何故言一切法離言說等相。答以明如來根本之義。顯性相不殊之旨也。小乘觀智以性外有相。相外有性。此大乘法門卽性卽相。卽相卽性。本無二體。如法華云。是法住法位。世間相常住。若以相外求性。是撥波覓水。離響索聲也。復次真如者。依言說分別有二種義云何。爲二者如實空以能究竟顯實。故二者如實不空以有自體具足無漏性功德故。

已上離言說等相以顯真如之體。此依言說分別以明真如之義。但爲依言生解。不可隨言執取也。義有二種。卽上自體相用也。卽體而名如實空。卽相用而名如實不空。亦承上不可遣不可立而有此二種之義。既不可立卽如實空。義不可遣卽如實不空。義空名如實者。以能究竟諸法皆是真空。實相非同妄性無體也。名如實不空者。以一切淨法雖同體空寂不妨成辦無量性功德故。所言空者。從本已來一切染法不相應。故謂離一切

法差別之相以無慮妄心念故當知眞如自性非有相非無相非非有相非非無相非有無俱相非一相非異相非非一相非非異相非一異俱相乃至總說依一切衆生以有妄心念念分別皆不相應故說爲空若離妄心實無可空故

所言空者明眞如體中離一切相也以從本已來自性清淨與一切染法體不相循一切染法唯依妄念而有此眞空體中絕無妄念故一切差別之相悉皆離故當知下詳明離一切法差別之相乃至總說下正顯以無慮妄心念然一切法差別之相不出有無一異卽外道之所執也以有妄心念念分別乃凡夫以爲自性卽小乘不能淨也此如實理中超諸凡外并小乘法唯眞無妄是故皆非總顯眞空體中離心意意識絕凡聖伎倆也若離妄心下正釋如實之義以顯空諸所有而眞空之體實不空也

所言不空者已顯法體空無妄故卽是眞心常恒不變淨法滿足則名不空亦無有相可取以離念境界

唯證相應故

言不空者顯眞如相用之中卽一切法也雖具足諸法亦不離眞空之體故云已顯法體空無妄故卽是眞心常恒不變淨法滿足由依此常恒不變之眞心淨法滿足始成如實不空之義前文所謂自體具足無漏性功德故也雖淨法滿足亦無淨相可取以離念境界唯證相應故然有念則攀緣諸法既無能念事有所取但智與理合唯證相應其實無有能證所證也此眞如門文分二段理實一揆前顯眞如之理故名一法界大總相法門體此明眞如之義故開二種之空然理外無義則一法界大總相法門攝空與不空之二義義外無理則空與不空歸一法界大總相法門之體義中如實之空卽空如來藏如實不空卽不空如來藏此二種義既歸一法界大總相法門體則一法界大總相法門卽空不空如來藏也固知卽空而不空不空而空二邊不立中道亦泯方盡眞如妙旨如來根本之義始極矣